

**Kerajaan Komited Bina Lebih Banyak Rumah Mampu Milik
Bernama
18 Oktober, 2012**

GEORGE TOWN, 18 Okt (Bernama) -- Kerajaan komited untuk membina lebih banyak rumah mampu milik bagi golongan setinggan dan berpendapatan RM2,500 ke bawah untuk memastikan golongan itu berpeluang memperoleh rumah dalam tempoh setahun atau dua tahun akan datang.

Timbalan Ketua Pengarah (Pembangunan) Jabatan Perumahan Negara (JPN) Datuk Mohamad Yusoff Ghazali berkata sehingga 31 Ogos, JPN membina sebanyak 65,550 unit rumah melalui Program Perumahan Rakyat (PPR) dan sebanyak 39,000 unit rumah PPR akan dibina bagi tempoh Rancangan Malaysia Ke-10.

"Kerajaan sedar sekarang ini rumah di bandar-bandar besar seperti Kuala Lumpur, Pulau Pinang dan Johor Baharu harganya meningkat terutama rumah yang bernilai RM400,000.

"Kerajaan adakan pelbagai program melalui Perbadanan Perumahan 1Malaysia (PR1MA), Syarikat Perumahan Nasional Berhad (SPNB) dan JPN untuk menangani isu perumahan mampu milik ini," katanya kepada pemberita selepas merasmikan Seminar Perumahan 2012 di Universiti Sains Malaysia (USM), di sini Khamis.

Beliau berkata demikian bagi mengulas kenyataan Perdana Menteri Datuk Seri Najib Tun Razak yang mengatakan kerajaan sedang menimbang untuk membiayai kos infrastruktur bagi membolehkan pemaju swasta membina lebih banyak rumah di bawah harga pasaran.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=702936>